

本朝分省人物考

人物考卷之二十一目錄

南直隸蘇州府四

吳洪

劉纓

姜昂

陸容

顧福

李傑

劉杲

王倬

沈林

周詔

沈杰

毛珵

王哲

張琮

吳一鵬

附子孝

盛應期

沈燾

祝允明

朱希周

蔣欽

陳天祥

顧鼎臣

周倫

本朝京省人物考卷之二十一

南直隸蘇州府

四

吳 洪

吳洪字禹疇吳江人也洪少穎拔年十二補弟子員動必循禮嘗與同舍生奉詔下屬司開讀旁近富人欲招致宴飲而其詞涉倨同舍生以貧故弗校洪曰此非所謂嘑爾之食耶謝不往學官有過嚴者諸生至愬於御史欲逐之洪曰師與父同可叛乎卒不置名於是識者已必其爲遠器矣年二十四舉成化辛卯鄉試乙未登進士初授南京刑部主事歷員外郎

郎中諸所聽斷都人屈服有疑大司寇必屬之恒存
欽恤因病輒損俸爲糜啖之丁未陞貴州按察司副
使未幾以內外艱歸癸丑服闋改廣東巡視海道海
濱素稱利穴處脂者不無染指洪至秋毫必凜刪弊
且盡粵人歌之御史王公哲欲葺諸公署而費無從
出籌之洪洪曰鹽司有舊引若干舊爲權豪所專不
及於商今請以給商可得錢數十萬其事濟矣如其
言而費遂給中官守兩廣者令四驛各以一舟聽役
舟敝又令輸金已而兩徵之民亦不堪御史汪公宗
器將革之且欲追所得之金洪曰往者不可追况未

必能追乎第自今釐正勿病吾民足矣如其言而守
官帖然有叔侄同行異宿其叔宿樹下爲漁人所殺
投池中侄意其宿於別館也訟館人及池旁者數家
械繫且死衆莫辨洪廉得其情乃以漁人償死盡脫
諸冤者人以爲神官軍濫殺邀賞諸死者之家以冤
聞遣廷臣核驗洪與焉悉心推訪盡正濫殺者之罪
尤尚儒術所至進諸生試之凡一經賞識多中高第
尋擢福建按察司按察使瀕行右閩帥以犀珠走間
道爲餽洪謝之帥曰公去矣某無所干且人無知者
何損公名洪曰若意善矣然非知我者也卒不受閩

俗歸訟洪聽之必以其情民率悅服明年建寧延平大水民貧且互劫輒以便宜發粟賑之汀漳軍餉缺盜賊蜂起取征商之羨賑之而民始安土徭戍者有所索守臣集三司議焉洪曰不與則致叛與之則爲例不若以貸爲名而姑與之羣僚歎服富家之主嘗乘兜他出以一奴隨中道忽棄兜與奴步歸還則爲典財者所害主家訟奴及二傭之昇者於官奴曰傭見吾歸而殺吾主傭曰奴引主去而殺之耳吏莫知所坐洪曰三人同發主家顧不畏其家屬而中道殺主乎訪其里嫗知典財者有手血濺衣之迹捕寘於

法布政司之吏有微罪鎮守中官銜其使欲重吏罪以爲使累洪厲聲曰殺人媚人吾不爲也辛酉入爲太僕寺卿時方多事乃正羣僕修馬政邊陲倚之乙丑進工部右侍郎督理易州山廠於薪炭羨餘及公固邸舍之息一無所取正德丙寅遷左侍郎入視部事會有黨逆瑾怨司馬劉公大夏而誣以重罪者

武宗下大臣議洪力辯之已巳冬部長缺資望及洪而瑾方納賂爲有力者所得未幾遂有留都司寇之命寧河王鄧愈之後有兄弟爭所賜田宅者詔南京三法司覈之其兄倚瑾爲援而求勝焉洪不從忤瑾

令致仕洪曰是吾志也飄然歸吳江杜門謝事惟日課子孫讀書奴婢耕織暇則嘯歌自樂里後生考德問業及郡邑大夫從而諮政者酬應無倦縉紳道於其境必式其廬而禮焉家居十五年廟堂之憂無日不往來於懷吳中族寢盛懼其久而漸疏也作譜明其宗嘉靖甲申得末疾繼聞仲子巖之訃溘焉而逝享年七十有八子山爲浙江布政司左叅政次巖與山同登戊辰進士官亦如之訃聞賜祭營葬贈太子少保賜誥命以寵嘉之

劉纓

劉纓字與清號鐵柯其先江西清江人徙吳縣成化
戊辰登進士明年出知武陵視縣事若素習有長賦
而忘粟若干斛者郡坐以侵欺罪死止以亡矢擬之
分守官閱其牘曰此良法吏也卒從所擬庚子丁母
憂終喪改知滕縣縣久凋敝至則蠹強鋤而以惠利
字之有婦抱兒涉瓜畦守者挑之不從納數瓜誣爲
盜纓以兒與瓜令守者併抱之隨墜地乃曰爾謂抱
兒之婦能取爾畦中瓜非誣邪懲而遣之其鉤撫精
敏類此居三年入爲河南道監察御史弘治戊申出
按福建沙縣民陳富謀利其妻姪鄧釗之產爲匿名

書誣釗殺父并及釗所親昵者二人獄已成矣纓密訊之則釗父實以負債不能償而自刎也論富如法而三人得釋琉球入貢挾賸貨與閩人輒構隙而開纓以爲傷國體禁之後遂以爲法辛亥出按廣東東荒豪民張政家海澳嘗通番殖貨夤緣公牒得捕盜海上欲奪珠市世業者十人之利悉誣爲盜繫死者七人矣餘將論決纓讞得其情立破械出之而以政抵死指揮倪鳳以捕盜縱橫尤甚然聞其陰養死士急之恐變乃以他文誘致而殺之守臣妄奏俘男千數可官以給用者有詔往取鬻海南良家子以充

腐且三百餘人矣乃兼程渡海覈實值管押官方繫
小兒五百人艤舟德慶卽日縱遣之其家人感恩皆
曰非劉公吾世殄矣癸丑還 朝率同官劾外戚語
侵中官忤 旨下獄賴 孝廟仁明杖而釋之在道
九年兩按大藩劾罷監司守令而下不職者三十六
人罪諸舞文及所平反者各百餘人一時稱爲才御
史丙辰擢太僕寺少卿時馬耗且多私鬻立法審辯
其弊始清久之條列利害當興革者二十事越五年
進右僉都御史巡撫四川兼理松藩軍務先是撫臣
畏險遠未有履行邊境者纓乃乘竹塹度索輜徧行

列寨因細察其事端則知諸戍與番族緩則挑釁急則連和而其弊在我者大都什七及使者乘傳行邊恐夷出擾則又預置綵幣羊酒於扼塞以賄之謂之買路具爲禁令夷亦帖然在蜀甫一年感疾乞歸越四年御史龔元言其明練蜀事奏起之得再鎮蜀諸番掠樑新堡勢甚猖獗遣官兵討之前後俘斬千餘賊懼皆投兵羅拜誓不再犯又橫梁向道及蒲江廢關數苦諸番鈔掠奏各立分司守之自是邊鄙不聳全蜀以安會逆瑾議省巡撫亦例罷其年八月復命巡撫湖廣初在蜀嘗議闢自夔抵荆之路可以避

江險通行旅人甚稱便而瑾怒纓不先奏請遽赴
詔獄賴廷臣論救釋戊辰陞南京大理寺卿尋召入
爲兵部右侍郎崇明盜起權募民應敵所司請如官
軍月廩之纓曰往年有借關隴民兵討峒蠻而給月
廩者其後竟隸尺籍人方恨之茲可踵其弊邪事遂
寢越二年陞南京刑部尚書獄之大小必當於情法
乃已靖江有豪民緣姦殺傭婦而坐死者因所知以
千金丐免纓不可竟入死焉癸酉三月考滿赴京疏
三四上准致仕以癸未三月卒年八十二

姜 昂

姜昂字恒頰蘇州人也生而端重介特不苟言笑數
歲刻礪讀書成化間登進士出知棗強一意愛民凡
所決遣自以不寃門無呵卒獄無滯囚三年召試監
察御史時方士李孜省得倖昂率同列疏論之命杖
於午門外以親老乞改南京河南道出理福建戎籍
擢知河南府值歲大旱至則雨隨霑足洛人抃舞每
晨吏白事退終日閉閣觀書鞭箠懸不用時母夫人
年八十䟽乞近郡便養不許䟽復再三至乞降府佐
或教授它日除邊遠自効乃改知寧波寧波聞昂至
同官皆減去輿馬華飭俳優雜劇不一陳於前日本

人貢過郡望風歛戢不敢羣譁於市六年復以母老歸養進福建布政司左叅政不起且上疏乞終養母卒服闋部使者奏起之而以疾卒昂生平於取予毫不敢苟在官日買肉少許奉母自食蔬菜子弟學書不得用官紙筆非歲首未嘗燕客不受人饋貽亦未嘗餽貽於人權要請託一切報罷以是人多不悅而亦不能毀也

陸容

陸容字文量崑山人少治掌故業而誦學諸經兼通之人謂何多學爲取青紫顧在此耶容笑謂吾自求

通經非有他慕也成化間登進士主事驗封又歷職
方武庫當虜急封事日三四上籌畫方略累數千言
皆其手出而動中事宜西域貢異獸至嘉峪乞遣使
以兵迎之容言獸非其土性不畜且上方罷獻而
何以迎爲庸不取遠夷侮也交人屢未靜議聲兵討
之容言不當窮遠略且久臣服未敢顯叛我而遽加
之兵地且險遠豈謀於萬全者哉時以爲然錦衣韋
映者凶狡方倖已罷之又幾幸以復用容言於尚書
疏上竟論死而被誣汚者皆得釋往告變者賞重故
妄詆以妖言輒坐容請分別之無滋濫自後告者乃

衰有倚中貴人求將者執不下乃言之 上召面諭
旨容對以西南夷重地將非其人啓釁生患怨結於
夷異時者臣不敢任其咎事竟止容以小臣抗言在
廷上聳已而聽之者再有欲用二人爲都督者容益
持不與言都督今之大將必有功後授彼何者遽敢
請亂擅命以私市此而不懲何以杜倖門正威罰
上從之遂著爲令他所論國馬與穀藉輕重設版法
致民田牧又陳事四及選衛卒益實之皆經國大者
遷叅政浙部其所發奸如神又列便宜十餘事上之
悉見從以計入論漕渠利害語侵時貴益取忤遂罷

免容素有當世志其所守官無不竭盡有可益國便計卽未能行必疏計之事親孝疾則累月不解衣夜嘗醉歸母不樂遂終身節之持服不離所廬居凝然無喜愠色若不可親而與人則深相恤嗜書多所博綜時有所著若式齊菽園州志兵錄諸書有傳者

顧福

顧福字天錫號雲厓姑蘇人以成化乙酉舉鄉貢丙戌登進士第歷刑部主事員外郎郎中調永州府同知遷知吉安府擢河南布政司右叅政分司南陽致仕卒初在刑部聲甚著錄囚山西多至七千餘衆平

反者六十餘人前後四十餘疏多見採納每攝他司
事事皆立辦勘獄浙江發巨賊七千餘兩時錦衣千
戶吳綬勢甚熏灼勘獄者皆往受成議福獨不往會
下詔獄遂摘其疵誤出貳永州受檄決獄至兼旁郡
有部檄徵芽茶香草福計合藩所徵全數上疏請停
之至吉安承大猛後稍濟以寬剝理繁錯不動聲氣
而條緒具舉獨不善事上官或以簿書相窘然卽所
治校之諸郡不啻兼之矣陳時政六事時議遽之叅
政報至民兵數千人遮道泣送南陽宗藩軍校多不
戢每用理斷亦無怨辭撫徠流徙復業者四千餘戶

修諸葛武侯廟及閱武場開拓有加其去也以老疾
名蓋郡人在言路者以私請弗護故陰爲媒孽而其
藩人猶惋惜不少置乃自歎曰藩不負吾而郡負吾
賴幸有二三知己者尚存何言哉旣歸日與鄉大夫
士觴咏爲樂足不至公府手不操書札惟歲時以詩
寄興未病前一月猶然生平尚意氣故人潘郎中琚
客死殮葬之其子鼎方十歲攜以自隨比長以女贅
之又置田廬於蘇居其寡孤趙知府禎沒又以次女
妻其子鎬弟祿早世葬北土者二十年亦歸祔于祖
墓卹其嫠伴不貳志後旌爲節婦事其兄光祿丞禎

世謹嫂欲析居卽俯遜於外泣告於兄乃得歸然引咎自責未嘗一以語人母喪廬於墓側者三年朝夕泣奠孺慕不異於生存焉

李傑

李傑字世賢常熟縣人成化丙戌進士改翰林院庶吉士授編修陞侍講二十二年充東宮講讀官秩滿陞侍讀學士弘治初以宮僚恩陞左春坊左庶子兼侍讀學士四年陞南京國子監祭酒時方修廟實錄留館中校正書成乃行以憂去服闋改太常寺少卿兼侍讀學士掌院事十三年陞南京禮部右

侍郎十五年改禮部右侍郎轉左侍郎正德元年充
孝廟實錄副總裁尋陞南京吏部尚書二年改禮
部尚書時逆瑾用事納晉府鎮國將軍袁謙等賂欲
進封爲郡王傑與尚書張昇皆持不欲進封之意忤
瑾意遂令致仕瑾誅有 旨起用竟以正德十二年
卒傑持已矜嚴待後進頗立崖岸晚以忤瑾而去士
論高之其所爲詩文亦溫厚可觀

劉 杲

劉杲字世熙長洲縣人成化乙未進士授南京禮部
主事轉刑部員外郎歷四川湖廣按察司僉事副使

貴州按察使陝西右布政使轉江西左布政使尋乞致仕進右副都御史歸正德八年十月卒於家杲所至皆有聲其在湖廣朝廷用言官計括流民議遣戍邊所在洶洶杲亟白當道驗其文引久近生業有無以爲去留其恣肆者始按以法民心乃安爲布政入覲時逆瑾脅諸藩杲邀重賄杲獨斷斷不可人至今稱之

王倬

王倬字用檢太倉州人成化戊戌登進士出知山陰縣以憂去改餘干又改蘭谿於山陰多興滯補弊革

額外科取之陋政聲赫然餘干有爭田者積三十年
不決拘累千人比行視田指一大樹曰以此爲界二
家俱服有毆人實不死者其家匿被毆者以他屍誣
之累辨莫伸倬廉得匿所密使人捕至竟抵誣者罪
凡疑獄迎刃縷解未期月囹圄爲空贛盜殺信豐尹
督兵討之賊據山爲險擂石雨下莫敢進乃夜縱白
羊千頭於山下鼓譟從之賊亂投木石比曉略盡進
兵大破之生擒三百餘人斬首千級遂平其地蘭谿
以積逋糧里繫監倬至一訊釋之在赦前者蠲除餘
爲立限以次輸足旬日獲盜十餘輩夜戶無警素舞

文者皆歛跡弘治乙卯擢南京山西道御史首劾銓
司貪污者罷之又劾免尚書五人方面二十七人楊
太監者倚寵橫甚至箠繫進士劾罷之時北邊大警
詔以平江伯陳銳充總兵上言銳素非統御才必
僨事已而果無功旋進貴州兵備副使承米魯福佑
亂後荒夷出沒爲患乃修城堡宣 朝廷威福漢夷
畏愛土官阿偉素桀驁不受約束召之卽至俛首誓
服正德丁卯以例裁革改廣東瓊州兵備時親脫符
南蛇之亂生黎爲梗倬巡視多所俘獲贖還男女若
千人崖州千家村尤猖獗屢聲言討之而師不出忽

乘其無備襲破之明日大戰又敗之斬獲其衆分三大村爲小村以弱其勢奏建守禦千戶所自是黎人不復反進雲南按察使廣東右布政使會征臨貨砦克之餘賊匿山谷衆欲乘勢殲之倬不可以禍福諭其長悉來降事聞賜白金文綺改四川左布政盜起蜀中逼成都鎮守議焚附郭民居以絕賊倬曰是益賊勢也乃勒軍列營以待洞開四門賊不敢逼時列郡羣疲於饋運在途多被擄掠癘疫死者相屬皆罷之出庫銀糴米貯各倉量遠近給之民免轉輸軍無缺乏總制彭澤令具馬三萬緩則以軍法從事州縣

猝無所出倬命各鄉村馬俱入城避賊擄掠不數日馬俱足又需熟糧四千石明日日中至督各市行分運至軍中日猶未午彭大奇之旋進右副都御史巡撫順天等府時屬縣大饑人相食奏請通州米十萬石賑之以尚煩轉輸旦夕莫保乃許在邊官軍俸糧預支兩月益以餽直而以官軍所在俸糧給散饑氓軍民兩利焉時虜射死叅將陳乾總兵太監合兵討之屯馬蘭峪倬曰虜知吾兵屯西必且東入乃命指揮葉鳳率兵伏山下虜果毀東墻入伏發斬獲六十餘級奪回男女千餘事聞勅獎有金帛之賜御史

劾指揮十七人臨陣退縮當斬倬曰未經督委何謂
退縮十七人皆得免乙亥進南京兵部侍郎旋以七
十懇致仕不允及年七十二上疏乞歸許之給驛以
歸仍令有司以禮存問至七十有五卒倬癯然儒者
而胸中富有經綸善因事爲功故所至有聞在餘千
額外積六萬石廣東覈庫藏出內復官銀八十餘萬
兩薊州修築邊牆四百里常道出彭蠡有漁之類輩
趨而前曰故吾餘干父母也爭獻魚酒倬爲各少受
之之官四川餘寇多在人爲危之至境諸蠻相率迎
拜曰生我者公也護送出境貴與崖州各立生祠以

祀居鄉以孝義稱親病躬視湯藥不解帶居喪三日
水漿不入口與兄析烟念其子女多讓以口田半創
立家廟割田千畝爲義庄授宗子世掌之中苦糧
役往往破家人爭規避倬獨曰吾家多受國恩敢辭
公役乃會族人糧多寡割田千畝分番應役無負租
無縲繫凡故舊僚友下至戍卒役氓有告者必獲所
濟逆瑾擅政凶燄熾灼或勸爲自全計倬曰死生禍
福天也使我因是毀其平生雖生奚爲其自立如此

沈林

沈林字材美長洲人少好學成化甲午舉鄉試辛丑

成進士時方重內輕外或謂有倖門可得內除林不從出知晉州州人情而竄教之樹藝蓄積修城垣興學校民間利害以次罷行州之人皆欣然曰沈公吾父母也弘治己酉進南京刑部員外郎中出知四川順慶府始至庭叅鎮守鎮守驕蹇不爲禮林一拜而起鎮守怒曰一拜禮乎林曰若不以禮自處安能以禮責人不顧而出巡行二州八邑之間覲觀風土詢求民瘼俗喜告訐株聯蔓引動至百人一見立決無所牽引人甚便之郡學湫隘文廟列堂之右撤而遷之建御書樓增置黌舍齋廬庖庫祭器又增樂舞生

教以聲容舞蹈之節暇則親臨程試講解懇懇無倦
士子皆奮文獻遂爲諸郡甲郡故無城郭乃鑿西山
之石仍溝洫物土方度高卑厚薄俄遷雲南叅政蜀
寇藍廖倡亂所過殘破屢至順慶不能入遠近來依
保障民益思之至雲南交人忽耀兵境上遠近恒攘
林曰吾在此無恐吾請以身當之已而訖無事正德
丁卯入賀 聖節時逆瑾盜政內外官罔不叅謁林
固不往瑾嫌之銓曹屢上政績不報最後擬山西布
政命甫下瑾已遣邏卒訶其行遇之途抗手而過至
撫拾無所得獨以沿途乘傳白瑾有石文義者適在

傍曰沈良吏也文義蓋未嘗識面而聞其名有素瑾
爲免逮下巡按御史問狀家人思禍不測規以賄免
御史亦故緩其獄使得爲計林曰無庸隳官祿與隳
名節孰重竟落職爲民罰米輸大同又輸沿途傭直
怡然以歸逆瑾伏誅言者奏起爲廣西布政使單車
就道一如雲南之治近世有所謂公堂錢者多出賦
稅之美名曰公堂盡歸私篋雖號良有司亦然林一
無所染凡修葺廨宇立坊牌則取之又以其餘鎔範
杯斚之屬爲公府宴饗用時巡撫交章剡薦遂進都
察院右副都御史巡撫貴州兼理軍務時鎮筸銅仁

烏羅等苗屢出劫掠爲患前撫臣率以化外羈縻不究林曰不一翦刈且滋蔓蔓難圖也率勵將士爲深入計預給旗牌招徠安輯諸寨皆歸附天生厓固恃險攻之藺石毒矢交下人莫敢嚮邇林調兵先截其餉道賊已困火鎗飛礮繼之賊大窘奔竄俘其衆千餘牛羊器械無筭陳家孟溪九十七寨相率來歸給以流官悉隸貴前二衛以革土官貪殘積弊自是內境晏然初藍廖二寇橫行蜀中數年朝廷大發兵剪之思奔迸隣境爲患分兵守諸要害蜀寇盪平有騎角一助焉癸酉聞父艱乞歸守制朝廷遣官諭祭

服闋詔起巡撫山東初在貴用兵勞勩成疾繼以哀毀在途病加劇遂固乞致仕詔命馳驛以歸歸四年辛巳卒春秋六十有九

周 詔

周詔者長洲人也自少有氣節成化庚子登鄉試授嘉祥縣教諭九載考績入京時 睿宗方開府置屬遂與選爲伴讀遷紀善詔以國事草創宜有典則以垂後世乃本祖訓及中庸九經之目爲書數千言以獻 睿皇嘉之尋以憂去賜予甚厚復仕加長史俸詔感知遇因事納忠言多切直 睿皇喜書君子懷

德及諸詩以賜之每見稱爲先生而不名詔數請謝
事不許乃以展墓乞歸其鄉及返國未至而 睿皇
崩詔匍匐奔泣如喪考妣事 世宗在藩邸詔每進
講經史 上爲之竦聽扈駕入京師遷詹事府少詹
事兼翰林院侍讀將大用之居數月疾辭轉太常寺
卿遂卒於官 上聞惋惜贈禮部右侍郎賜祭葬

沈 杰

沈杰長洲人生而多病十歲始入小學學賦詩鼓琴
繪畫篆刻曾無仕進意年二十始銳意經史學大進
成化庚子遂占應天鄉試甲辰第進士出知河南歸

德州州當黃河衝隨塞隨決杰至相度源流地形高下乃於城外五里許築長堤捍水樹以榆柳又開白柳等河河水由之入淮睢民始免墊溺饑歲民流作粥以飼老弱少壯給之行糧使歸畊且給之子粒牛具戶口日增鄰封有訟久不決者立決之兩皆意滿而去入爲右軍都督府經歷出知廣東南雄府以憂不赴改授浙江衢州衢州多水田雨則溢晴則曠乃大興水利濬陂池築堤堰修復魁星等閘民田得灌漑而城中無漂溢之患又倣常平倉例歲饑減價以糶收成增價以糶豐凶有賴倉無紅腐初 宣聖有

劉孫在衢儕於齊民杰始命復其家疏於朝得世襲
五經博士又奏起樊尚書塋崇飾先賢趙清獻祠爲
政知所重皆類此事聞尋擢山西左叅政又進河南
右布政使河南民曰是故歸德君耶懽迎之未幾歸
守制吳中屬逆瑾亂政坐罰米二千六百石言官有
不協者因疏以老疾杰不辯第曰言官言是吾老矣
遂卧不起居吳下十年年七十一卒

毛 珵

毛珵字貞甫號礪菴吳縣人生而岐嶷不類羣兒選
入邑庠時未冠也成化丁未成進士弘治庚戌授南

京工科給事中巨璫薄琮在留司積甚設筭陷士類
一時臺諫多以罪去程摘其尤不法數事露章劾之
竟下獄論死尚書秦紘鎮廣南與安遠侯柳景交構
中官護景逮秦詔獄程抗疏申理因論景諸不法有
旨景閑住而秦得致仕大學士丘濬博學自信以天
下爲已任而多泥於古剛愎任性以辨博濟其說人
莫能難程疏言天下事非紙上陳言可舉而古今異
宜遠近異勢亦非一已之見可盡如濬之才置之翰
林則有餘在論思之地則不可言雖不用時論韙之
有御史以言事成荒遠者程言其母老可念請移近

地以廣 皇上孝思又言餘官以言謫外不得同言
官牽復則是臺諫之外不容有言矣豈所以廣忠益
哉 上皆嘉納丙辰以病予告家居久之庚申起爲
戶科給事中擢山東布政司左叅議時舊疾復舉上
疏乞解新任不允逾年始赴時中官出鎮怙恩驕恣
多所漁取而藩府供億圉奪縱橫最爲民病理隨事
處分不激不靡民得不敝而法亦畢舉屬吏非大過
未嘗有所譴呵至治豪猾懲胥徒則盡法無所貸在
藩三年以疾乞歸正德丙子以薦起鴻臚寺卿遷南
太僕寺卿會逆濠叛首下九江攻安慶留京戒嚴尚

書喬公集羣僚議所以攻守理言留京國家根本重
地而安慶實留京屏蔽無安慶卽無留京矣賊起倉
卒以我無備故直搗九江以窺江左當出其不意調
集民兵水陸並進可以得志若待其至則虛實形見
人情恒擾事不可知喬公以爲然遂以便宜檄理督
潁泗和陽諸軍爲江表聲援理卽日出次泗上會罪
人旣得中外解嚴復還領太僕尋擢南京右副都御
史督視江防理以年及七十上疏辭不允改撫治鄖
陽再理前疏

王哲

士哲吳江縣人弘治庚戌登進士授江西道監察御史福建清軍兼理鹽法時有以同姓被誣爲戍卒者百餘家淹禁累年一訊卽辯其枉出之軍籍又多隱漏設法清理歲以千計所領鹽法課又最於他御史十年出按廣東時劇賊陳光等流劫新會東莞二縣哲畫策不旬月平之南海縣十三村負固數爲亂鎮巡議屠之哲曰村戶不下萬餘豈無一良善者乎玉石俱焚吾不忍也乃輕騎率廣州知府詣其巢諭以禍福且許自新其父老感泣曰巡按公活我卽解散從今又每村立土里長以約束之旣而以外艱歸民

號泣追送不忍去服除補任出按江西所至卹民隱
作士風表先賢祠墓董鎮守怙勢凌侮縉紳至匿盜
賊不以聞人莫敢問哲首劾其不法數事 上切責
鎮守且以治盜事付哲嚴限有司遂擒盜魁 賜勅
獎諭時天旱種不入土乃親錄繫囚出其所當原者
數百人翼日雨是歲有秋又善斷疑獄民有女奴自
逃其讐指爲故殺訟於官者獄旣成哲復訊見其有
寃色使人訪女奴所在得之民得不坐又有大家被
盜因誣其所怨者賂鎮守欲置諸法哲察其誣出之
鎮守怒衆亦以爲疑後真盜出始皆愧服以爲不可

及民爲之謠曰江西有一哲六月飛霜雪天下有十
哲太平無休歇十六年陞山東副使守備臨清舉持
綱領不屑細瑣民安之夷人入貢者私市鹽事覺哲
謂不治則廢法治之則非所以柔遠人乃請沒鹽於
官仍給其直與之時逆瑾初橫中貴人有逆瑾斥南
京者道死臨清乃置棺埋之人爲之危不卹也正德
三年改任本省叅政尋遷廣東按察使未幾進南京
右僉都御史領操江事上言操軍脆弱異日有警必
不能支其後流賊弄兵江上果如所慮五年有江西
之命再改巡撫忤宸濠中毒乞歸猶日以江西爲念

逾年吏部奏將起用以病卒壽五十有七生平孝友
樂於周恤於書無所不讀尤熟於史卒之日貧無以
殮至今子孫窘乏無產業人益服其廉介所著有好
齋集十卷

張琮

張琮吳縣人幼知學奮勵舉子業慕東萊日記誦詩
讀書閱禮咸有程限曰學非過目成誦之爲奇而爲
之不厭者終有得也由是肆力羣書以至字法春秋
綱目無不究心登弘治庚戌進士初主事都水分司
清江水蘗自矢秋滿調儀制尋陟員外郎中方孝

勅不豫命免朝賀 東宮 親王如故琮執議不可
安有罷賀 聖上而獨賀 親王者占城請封或曰
宜罷琮言占城稱臣受封自 祖宗來已然無故罷
之何以臣服夷邦而示大信乎悉如琮言正德二年
陞陝西叅政以憂去五年忤瑾謫知濟寧濟寧南北
之衝也日費錢二萬餘琮力裁省什之六七聲譽翕
然達於京府俄遷山東道監察御史父老遮道泣留
及按甘肅安化初平人心洶洶琮正法令廣恩威舉
賢能劾不職歷邊圉定酋虜取虜刃視而擲諸地曰
爾刃止若此乎不及南方者遠矣虜皆縮項駭顧呼

琮爲太師且進羊酪爲壽邊陲賴以寧謐六年陞湖
廣副使奉勅撫民襄陽流民順逆不一琮則竭慮
剿撫白蓮僞教嘯衆千餘盜名稱號琮募死士殲厥
渠魁餘悉寬貸襄地安堵鄆藍方廖巨寇稔害旋亦
罄殄十年陞貴州按察使十一年陞四川右布政十
三年轉左攬頭全成多侵官銀誣引六十餘戶琮訊
得其情罪成釋諸被誣者又嘗靖苗蠻置邊餉節糜
費抑巨璫歷三省藩臬累荷朝廷金帛之賜丁父
憂服闋補轄廣西嘉靖元年遷右副都御史巡撫湖
廣益布德意不事苛察存活饑民四十餘萬平治安

德義陽芒部諸妖逆等數十族三年遷貳南京工部
俄改南刑五年陞南京右都御史履盛是懼執法益
嚴操已益忒維貞百度風紀聿修膺考察之柄則曰
進退人材 朝廷大事也敢不祇承先正謂恩歸於
已怨將誰歸是故覈別必公去留必當人心胥服以
疾致仕壽六十有八

吳一鵬

吳一鵬字南夫號白樓長洲人自少端重穎秀成化
丙午領鄉薦卽遭內艱廬於墓次弘治癸丑登進士
選庶吉士乙卯除編修預修會典及教內豎戶部尚

書周經被讒去位疏請留之人韙其直已未分校禮
闈尋丁外艱服闋復除編修纂修玉牒正德時逆瑾
盜政朝士見者多屈膝一鵬長揖而已瑾銜之未有
以發也已已 孝廟實錄成吏部奏例當進秩瑾遂
以未習吏事爲名而以一鵬爲南京刑部員外郎卽
又明習吏事書獄詞若老吏出入罪咸稱允當再遷
祠祭郎瑾敗復侍講經筵如故癸酉主順天鄉試有
槌策問中語謂譏時宰者出爲南京國子監祭酒積
饌金易民居爲學官寓舍經史多缺板亟補完之未
幾轉南京太常寺卿丙子雷變甚上言天人感應之

理辭甚剴切 世宗登極入賀上言祖宗付託之重
生民憔悴之極宜修德勤政以答天下之望入爲禮
部右侍郎尋轉左署掌部事奉 勅馳詣湖南改題
恭穆獻皇帝神主奉迎來京一鵬念與中貴勲戚
同事恐其下不戢乃上疏曰今歲涿州抵安陸災傷
重大民不聊生所宜節省以甦民力隨行儉從或挾
聲勢凌轢有同爲害者請預禁約 上善其言而戒
飭之事竣有白金文綺之賜給事中陳洸已外補僉
事仍冒舊銜上疏欲假大禮以希留用一鵬劾洸無
耻竟以罪罷去修 武廟實錄充副總裁乙酉史成

進禮部尚書是冬乞假歸吳中省墓還疏言途中往來見江南亢旱淮北大水乞遣官體勘或蠲其稅或貸之粟河道湮塞乞下詔訪求或濬故道或開別支上嘉納之時岷藩與棗陽庶人俱乞復王爵序班錢撫寧訓導王玠以考察去官援嘗議大禮奏乞復官而禮左侍桂萼曲爲之請一鵬堅持不聽明年桂改吏侍遂挾前憾與同官比謀奏加太子太保改南京吏部尚書再疏乞歸得俞歸則於所居之西創崇正書院以奉先聖先賢聚里中髦士肄習其中割田百畝供膏火之費約諸鄉老月一會爲文字之飲

隱然有洛社之風焉子孝己丑進士改庶吉士文章志節夙出人表後與相嵩子忤出之湖廣叅議旋免歸

盛應期

盛應期字思徵吳江人也弱冠舉弘治癸丑進士授都水主事管濟寧閘令行者艦相銜尾以進無得爭先吳公寬以少宰召猶爲宿留終不以權貴有所撓吳甚賢之中貴人奉使往來咸望風歛戢挾私者輒沒入之時太監李廣嬖用事諸中貴羣愬於廣廣固銜之而廣之家人私市鹽數十艘聞其嚴悉投之水

廣益怒乃嗾太監秦文誣奏阻薦時物船以闕宗
廟禮大不敬詔逮獄謫雲南安寧驛丞遷知雲南祿
豐縣古錄琫地也烏爨蠻所居俗獷悍習盜不鄙夷
其民教以禮法而弛捕盜之禁盜咸首伏化爲良民
陞順慶通判主糧賦稽逋槌伏宿蠹盡革父喪歸陞
武昌同知服除陞雲南僉事分巡金滄洱海景東知
府土官也父子信讒至相仇殺乃縛其讒人置之重
辟曉以大義父子如初鎮守太監梁裕貪虐無厭乃
與御史張璞副使晁必登共禁制之裕誣奏俱逮下
制獄張竟杖死諸大臣及言官連章申救會乾清宮

災赦出尋陞河南按察使轉陝西左布政鎮守監廖
鑾漁奪民財侵盜官帑奸賕狼籍有司脇息莫敢問
以法剪其羽翼廖不懌思中傷之檄督造絨罽費且
鉅萬按籍知廖前侵費數萬不以上供乃持數以示
廖將奏之廖惶恐跽謝遂不復造 武皇帝將蹕榆
林衆洶洶議加賦以備供億持不可請于正賦內以
丁糧爲差出米銀若干聽準來歲賦入之數比至供
億全湧取辦俄頃晏然民不知勞扈從諸倖氣焰薰
炙撫監重臣無敢吐氣獨暇整不爲懾請求皆裁以
法時司徒李在行間歎曰承勛自謂男子乃今知不

逮矣雖 上亦亟稱良吏才明年陞右副都御史巡撫四川時高文林數寇蜀而流人謝文義亦糾熒蠻爲亂皆討平之捷聞璽書褒諭賜以銀幣丁繼母憂歸 世宗馭極起爲江西巡撫江西當濠亂之後歲饑民窮寇盜充斥而鄱湖尤爲盜藪多屬漁舟以爲鄉導乃編號驗其出入而調遣官軍防邏之立團保之法使互相覺察盜無所容一時迸散於是輕徭賦議賑貸奏免雜調緡錢者數十萬歲連稔漕遂充溢繼上時留都方匱得以濟其乏而儲以待不時者又百餘萬大司農以能裨國計奏上特賜羊酒幣帛勞

之且以激示諸方岳陞兵部侍郎兼都御史總督兩
廣軍務前任者多通土官覬謁號令廢弛蠻寇竊發
比至大閱軍實鉤稽簡料凡中貴及總戎私役者悉
勒歸伍且檄下兩省及湖廣諸路凡所調遣悉聽關
白由是二府不悅大興讒構矣劇賊李文積爲亂發
兵討捕斬獲千五百餘級劉召據思恩以叛討破之
俘斬千餘召赴火死初二府蓄憾騰謗於當道當道
者欲事調停遂除工部侍郎提督易州山廠竄奪之
權也遂乞疏致仕會河決徐沛間壞漕渠進右都御
史總理河道辭不允而大司空議於昭陽以東接涉

河別開支渠而黃綰霍韜各陳便宜俱下治河隄者乃與所司履行其地相度所開延袤百四十里圖上形勢又與監撫使者及諸長吏謀旣協乃疏言河之爲患與江異者由地夷衍無所滙故弘治前分爲三其二由汴之南會泗水經淮入海一則由汴以北東至兗又分而二一出汴之飛雲一入徐浮橋以入漕渠會淮入海今獨以一徐受之奔溢趨汴橫流爲害夫爲河計者有四曰疏者決上游殺之也濬者順其故道也築者築堤以障之也改則別爲道而不與之爭也奏下如議於是分地賦任程事癸功甫四月計

可成八九會讒間大作有 詔罷役而謝任歸矣時
大司徒大司寇交疏爭之不得功垂就而廢咸悼惜
焉

沈 燾

沈燾字良德別號東溪長洲人也少穎異與兄方伯
公杰自相師友並有聲庠序間成化丙午薦南畿弘
治癸丑擢進士被選入翰林爲庶吉士試文優等館
閣六老咸器重之除國史編修教內書館嚴而善誨
癸亥校正本草命爲總裁始就局聞僉人欲假以倖
進卽上疏力辭人稱其有執乙丑修 孝廟實錄充

纂修官已未封安南王 命爲正使據經執禮凡餽
遺悉不受交人尤憚服焉使還滿三考陞侍講充經
筵講官已巳實錄成 賜白金文綺陞右春坊右諭
德丁內艱起復忽遘疾乞歸疏再上乃得請竟不起
年六十四

祝允明

祝允明字希哲蘇州人也生而右手指枝因自號指
枝生爲人好跣跣嬉游不矜容檢嘗傳粉黛從優伶
酒間度新聲俠少年好慕之 珩金游允明甚洽弘
治壬子舉鄉薦從春官試一 建時海內漸熟允明

名索其文及書者接踵或輦金幣至門允明輒以疾辭不見然允明多醉伎館中掩之雖累紙可得而家故給以不問僮奴作業又捐業蓄古法書名籍售者或故昂直欺之弗筭至或留客計無所出酒窘甚以所蓄易置得初值什一二耳當其窘時黠者持少錢米乞文及手書輒與已小饒更自貴也嘗遺黑貂裘甚美欲市之或曰青女至矣何故市之允明曰昨蒼頭言始識不市而忘弊之篋何益後拜廣中邑令歸量所受橐中裝可千金歸日張酒呼故狎游宴歌呼爲壽不兩年都盡矣允明多負逋責出則羣萃而訶

詩者至接踵怡然弗問所著祝子通祝子雜罪知蠶
衣浮物野記語怪蘇材小慕興寧志各詩文數百卷
卒年六十七

朱希周

朱希周字懋忠吳縣人也希周以弘治丙辰狀元及
第除官翰林修撰壬戌同考會試明年以纂修會典
功成陞侍讀充經筵講官中遭逆瑾煽虐撼制詞僚
以不屈從奪官一級爲修撰是後預修資治通鑑纂
要修孝廟實錄書成復官如故兼賜御製蟠龍詩
軸暨白金彩幣有差庚午主應天鄉試明年以憂歸

徘徊翰署艱虞半之丙子陞侍讀學士清理武職貼
黃丁丑充廷試讀卷官巳卯陞南京吏部右侍郎尋
改禮部復轉左侍郎乙酉陞南京吏部尚書當丁亥
考察娼嫉者譖言於上謂南科無一人之去以爲私
希周乃力辯其簡察僚庶所以別賢否非論曹局之
有無也使一曹皆賢必去一人以爲公則一曹偶皆
不肖亦將姑去一二以塞責乎詞嚴義正聲震朝堂
上亦不之譴仍聽稱疾東歸勅有司給人夫廩米比
歸吳趨里中市貨溢衢紛華滿目入其堂蕭然如村
落中見野翁環堵出與賓客游魚魚雅雅宛若崑山

舊弟子里中後生思畏名檢欲一有爲則曰恐玉峯先生知玉峯蓋別號也田廬閭閻俚事一不置念老隱陽山幾三十載未嘗一日去書不觀所著詩文評史論議總若干卷其陽山大石賦一篇尤爲吳人所傳驄車當路䟽起者前後幾三十人處之澹如也臨終戒其子孫身後不得請恩於朝萬一臺章以聞主上憐之賜謚易名願無以文爲謚脫犯吾父之諱忘魄何安蓋其父諱文始云

蔣欽

蔣欽字子脩常熟人弘治丙辰進士選授南京御史

時逆瑾擅權亂政偕同官十三人上疏方夜屬草燈
下聞筐篋間鬼聲戢戢欽念此疏一上定掇奇禍彼
鳴者將非我先人之靈念覆後胤欲以尼吾事乎因
起視曰儻是吾祖宗何不厲聲告我言未畢聲四振
於壁欽曰吾業已委身義不得顧私使緘默負國爲
先人羞亦均於不孝矣因奮筆曰死卽死耳不可易
也聲遂止跪上與同官皆坐逮被杖劓甚諸人皆延
醫飲藥欽獨曰吾得死所矣竟不療治而卒天下哀
之瑾誅贈光祿少卿嘉靖五年允言官請命所在立
祠祀之廕其子浣入監嘉靖十八年巡按陳蕙以祭

葬請特命給之

陳天祥

陳天祥字元吉蘇州吳江人弘治丙辰進士授青州府推官入爲監察御史遷陝西西安府知府擢山東按察副使整飭天津兵備時叛賊劉六等聚衆轉劫天祥嚴號令設卒守要害獲渠魁及其黨七十餘人加俸一級尋進太僕少卿仍理兵備事以賊衆兵少奏上命都督張俊率精銳援天津祥與之夾攻俘斬甚衆由是進都察院左僉都御史賊平徵還巡撫貴州兼督軍務洞苗亂天祥調漢土官兵分哨進剿

遂破諸寨擒斬凡六千餘級捷聞賜璽書獎勵有白金文綺之賜召還理院事以虜寇宣大用廷推往督軍務至則虜已遯矣已而進左副都御史以虜寇延綏又奉命提督三邊軍務虜亦遯賜蟒衣加俸二級又奉命理閩浙鹽道經吳江卒於家天祥警敏有才略臨事能斷所至有聲其在天津功尤著

顧鼎臣

顧鼎臣字九和號未齋崑山人也舉弘治進士第一授翰林修撰未幾孝廟上賓以修實錄成陞侍講再轉春坊諭德歷十餘歲世宗卽位首被知遇簡

侍經筵日講進學士上懋崇聖學日親儒臣討論經史因進講宋儒范浚心箴敷陳剴切上注聽嘉悅諭輔臣曰鼎臣解說心箴朕思味其意甚爲正心之助上廼親灑宸翰自註釋心箴又注視聽言動四箴及製敬一箴勅翰林院國子監及天下學校建亭立碑鐫刻五箴以示學者寔鼎臣之講心箴啓之也上又曰洪範一書於帝王爲治之大經大法實爲親切令鼎臣分段計日從容論說必使盡其所言以爲務學求治之助復慮詞訓繁多命撰次節略以進舊例每寒月免講上以洪範未終篇乃不輟講詔

免常叅專直講讀 上奉先聖先師位祀於文華殿
東室而數御西室召鼎臣等十臣令敷奏經義鼎臣
撰中庸首章講義以進推言人君致治期臻聖神功
化之極不可安於小康 上稱善 上於西苑作無
逸殿成命鼎臣坐講周書無逸篇陞詹事府詹事仍
兼學士賜一品金織仙鶴衣 上親耕籍田特命與
九推廷臣莫不動色悚歎謂 上寵異儒臣如此自
是晉吏部侍郎拜禮部尚書俱掌詹事府事兩被旨
教庶吉士於翰林故事用官二員獨受簡命自鼎臣
始雖職在文翰數奉召對預密議簡在聖心旣久執

政有不樂者數沮其進用戊戌八月始以太子太保尚書兼文淵閣大學士入贊機務眷遇彌隆被賜宸翰經籍銀幣玉帶麟蟒飛魚之服不可悉紀己亥二月加少保兼太子太傅進武英殿大學士車駕將幸承天勅居守京師鼎臣條奏軍國重計七事上悉從其請賜印記一其文曰經幃首選上曰卿講幄舊臣久懷經濟朕茲重寄宜欽承之鼎臣翌輔皇儲持挈綱維京師肅然以馭下過嚴致有煩言再疏乞休荷溫旨慰留明年感疾久不瘥上屢遣中官齎手札賜問以太醫往視賜藥劑牲米諸物疾革陳遺

疏勸 上親賢圖治願養聖躬詞誠懇篤降詔褒
而竟卒享年六十有八訃聞 上軫悼賜祭葬如制
贈太保謚文康遣行人護喪還鼎臣傑特有大志留
心經世隨事獻納多見采用嘗請訪求曾子之後以
奉其祀大同軍變請誅止渠魁以安人心四方郡縣
多奏水災疏陳生民困窮之狀請遣使賑恤而生長
東南見財賦日蠹民力日屈則三舉奏焉晚歲履政
府將大有爲然僅二載卒於位時論惜之

周 倫

周倫崑山人弘治癸未進士初授新安知縣選爲監

察御史以建言忤逆瑾罰米二百石輸邊瑾誅復原
職歷陞副都御史南京工部右侍郎南京刑部尚書
召入爲刑部尚書尋復改南京刑部致仕嘉靖二十
一年卒於家賜祭葬如例贈太子少保謚康僖